

պետութեան նախագահի պաշտօնը կարող է եւ ժառանգական լինել, եթէ մեր նախկին արքայական տներից մէկն ու մէկի ժառանգը յանկարծ յայտնուի (յօդ. ԾԲ.) :

Ակնարկը վերաբերում է Հերակլ Բ-ին, որին — ինչպէս ասացինք — նա համարում էր Բագրատունեանց օրինական ժառանգը եւ որի հետ նա անձնական ծանօթութիւն եւ նամակագրութիւն ունէր :

Այդ հակասութիւնը թերեւս կարելի է բացատրել նրանով, որ մեր հեղինակը օրէնքի եւ օրինականութեան ջերմ պաշտպան լինելով, բնականաբար չէր կարող խտել որեւէ մէկի օրինական իրաւունքները հայոց դահի նկատմամբ, եթէ նա իրօք ունէր այդ իրաւունքները : Միւս կողմից՝ լինելով շովէն ազգասէր մարդ, նա յարգանք էր տածում դէպի մեր հին թագաւորական տները, մանաւանդ որ հայոց պատմութիւնից նրան յայտնի են մի շարք անգամ ինքնակալ միապետներ — Վաղարշակ, Արտաշէս, Տրդրան, Արգար եւն. — որոնք մեծ բարիք են բերել հայ ժողովրդին : Եւ երբորդ՝ նա Անգլիայի օրինակով տեսնում էր, որ միապետութիւնն էլ կարող է օգտակար լինել իր երկրին, եթէ միապետը կառավարում է օրէնքով կամ այլ խօսքով՝ եթէ սահմանադրական միապետ է :

Բայց նորից կրկնում ենք, որ իր համոզմունքներով նա ընդհանրապէս ջերմ հանրապետական է եւ կառավարութեան այդ ձեւն էլ առաջարկում է ապագայ անկախ Հայաստանի համար : Միապետութեան փոխարէն — ժողովրդապետութիւն. միապետ թագաւորի փոխարէն — ժողովրդական կամք-օրէնք :

Ահա այն գլխաւոր հիմքերը, որոնց վրայ նա առաջարկում է կանգնեցնել ազատագրուած Հայաստանի պետականութեան շէնքը :

գ) Օրէնք

Հայաստանի փրկութեան եւ հայ ժողովրդի երջանկութեան ամենագլխաւոր միջոցը — Ծահամիրեանի կարծիքով — օրէնքն է, որը եւ կազմում է «Որ. Փառացի» ծանրութեան կենտրոնը : Գրքի ընդարձակ ներածութեան մէջ, մի ծայրից միւսը, դուք տիրուած էք տեսնում նրա դատողութիւններն ու դիտողութիւնները օրէնքի մասին, յաճախ նոյն մտքերը կրկնած կամ տարբեր ձեւերով արտայայտուած :

Տեսնենք, թէ նա ի՞նչ ստորոգելիներ կամ բնորոշիչ յատկութիւններ է վերադրում օրէնքին. այս մէկ. եւ երկրորդ՝ թէ արդեօք օրէնքը կարող է մարդկային երջանկութեան աղբիւր ծառայել եւ եթէ այո՛ — ի՞նչպէս, ի՞նչ ձեւով :

Ծահամիրեանի անկախ Հայաստանում օրէնքը ամբողջ ժողովրդի 1) եւ միեւնոյն ժամանակ նաեւ իւրաքանչիւր անհատ-քաղաքացու կամքի արտայայտութիւնն է : Ուրիշ խօսքով՝ ժողովուրդ-հաւաքականութեան եւ քաղաքացի անհատի կամքերը միանալով եւ իրար հետ ձուլուելով, կազմում են մի ներդաշնակ ամբողջութիւն, որ է օրէնքը : Օրէնքը ժողովրդի կամքն է, որովհետեւ օրէնսդիր մարմնի մէջ ինքը ժողովուրդն է, որ բազմած է յանձին իր ներկայացուցիչներին : Օրէնքը նաեւ անհատ-քաղաքացու կամքն է, որովհետեւ իւրաքանչիւր քաղաքացի իրաւունք ունի օրէնսդիր մարմնի անդամ լինելու, հետեւապէս նա ինքը այդ մարմնի մէջ բազմած է իրաւապէս եւ իր անհատական կամքը դրել է հանրային կամք-օրէնքի մէջ :

Օրէնքի միւս յատկանիշն այն է, որ ամէնքը ենթարկուած են նրան անխօս, կուրօրէն : Անհատի ազատութիւնը Ռուսոյի նման հասկանալով, նա հակասութիւն չի դնում անձի ազատութեան եւ օրէնքին ենթարկուելու միջև, որովհետեւ անհատը օրէնքին ենթարկուելով, իրենից դուրս գտնուած որեւէ ոյժի չէ, որ ենթարկուած է — որը կը լինէր, յիշուի, անձի ազատութեան խախտում — այլ իրեն, իր սեպհական կամքին, քանի որ օրէնքը — ինչպէս տեսանք — ինքն է դրել, նաեւ իր սեպհական կամքի արտայայտութիւնն է նա :

Երբորդ յատկութիւնը՝ որ օրէնքը մէկ է ամէնքի համար — սկսած պետութեան ամենաբարձր պաշտօնեայից մինչեւ յետին մուրացիկը : Անձնաւորութիւնը, ծագումը, դասակարգը, հարստութիւնը, պետական-հասարակական դիրքը, պաշտօնը որեւէ արժէք չունեն նը-

1) Օրինադրերի քննութեան ժամանակ մենք կը տեսնենք, որ հեղինակը, նման դէպքերում, «ժողովուրդ» կամ «ազգ» ասելով՝ հասկանում է երկրի բնիկ եւ հայ-լուսաւորչական ազգաբնակչութիւնը միայն :